

TESALONIAN

vdwa Paul gv Siti Lvnyinvbv Jinam

Mintamchonam

Tesalonika gvrja lo mvngjwngnv vdwv Kristo gv aakur kunam ha dvmin lakula kaayala doonam lvkwnv ngv mingominpenla minyakunam mv adwkakubv ribwng toku. *Paul gv Tesalonian vdwa siti jidvnam* si Ahtu gv aadw alu hv aaro pvku vla minam go. Paul um sibv minbvk jitoku, Kristo gv aatv madvbv alvmanv okv achialvbv alvmabv rigvnnv “Alvmaya choknv” vla minam gvlokv, hv Kristonyi rinyingriru riku.

Apostol Paul so puririnv vdwa dinchinv gaam vkv minpa jidu, adwkaku okv hirukaya nga mvngnga gvrila mvngjwng yanga haatin yala Paul la okv ninyigv lvkobv kudungkua ribam vdwgv rinam apiabv turnam lvgabv kudungkua rila doolakv vtoku.

Arwng lokv darlinnam

Mimtamchonam (1:1-2)

Hartv okv ayumnam gaam (1:3-12)

Kristo gv aakur kuse gv lvkwnv nga minam (2:1-17)

Kristan ridungsvngdung nga tamsarnam (3:1-15)

Minyakunam (3:16-18)

¹ Paul, Sailas okv Timoti gvlokv—Tesalonika gv gvrja gv nyi yvvbunudw Abu Pwknvyarnv okv

Ahtu Jisu Kristo gvbvrinv vdwa jidunv:

² Pwknvyarnv Abu okv Ahtu Jisu Kristo nonua aya okv sarsopoyo nga jigv nyika.

Kristo gv aarilo jwngkadakanam

³ Ngonugv ajin vdwa, ngonu nonugv lvgabv Pwknvyarnvnyi dw mvnwnglo umbonyikv vdubv rirung dunv. So si ngonugv vbvridubv alvnn dw vku, ogulvgabolo nonunogv mvngjwng ngv achialvbv kaiyaya duku okv nonuno akin-akinhv kvvbi am paknam rinam gvnamm hvka kaiyaya duku. ⁴ Vkvlgabv ngonu atubongv Pwknvyarnv gv gvrja vdwlw ngonu goosu dunv. Ngonu nonunogv mvritmvka okv hirukaya mvnwngnga saktv sula okv mvngjwng bvngla rikunama ngonu goosu dunv. ⁵ Svbrinam mvnwng sokv gaklin duku Pwknvyarnv gv jwngkadaka ngv jvjv duku, vbvrinam lokv kaapa duku nonugv hirukaya hinla rinam hv nonu Pwknvyarnv gv Karv lo aala dukubv riduku. ⁶ Jvjv ngv ogu vdwlw um Pwknvyarnv rire: nonua hirukaya monv nga hv bunua hirukaya naalwk jire. ⁷ Okv hv nonu ngonua hirukaya kunvnga saknu nama jireku, vdwlw Jisu nwgw kairungv nyidogindung nga lvkobv nyidomooku tolo daklin rikudw hv so vdwlw sum rireku, ⁸ okv hv vmv nga gudor dukubv bvngla ikula Pwknvyarnvnyi toa kunv vdwa okv Ahtu Jisu Kristo gv lvkwngbv Alvnn Yunying nga tvvmanv vdwa mvrit dukubv rireku. ⁹ Bunua hirukaya himbwng jikulo mvrit riku, okv Ahtu gv nvchi okv kairungv gwlvk lokv adu moreku, ¹⁰ Vdwlw nwgw nyi vdwa naarwk

tvbv ho Alu lo aarikudw ninyi mvngjwngnv nyi mvnwng lokv hartvnama okv mvngdv nama paareku. Ho nonuka reming gvvre, ogulvgavbolo nonu ngonugv minji kunam doin am jvjv ngv vla mvngjwng toku. ¹¹ Vkvlgabv ngonu lokia nonugv lvgabv kumdunv. Ngonugv Pwknvyarnv gv nonua singlakv vla goknam lo singla dubv rimutvka vla ngonu ninyia koodunv. Nonugv alvnam gv lvgabv mvngnam ha hv richi molaka okv nonugv mvngjwngla kudungkua rinam ha rinya molaka. ¹² Vbvrila Ahtu Jisu gv* aminv nonu gvlo hartvnama paadubv okv nonu ninyi gvlokv paadubv, ngonugv Pwknvyarnv gvla okv Ahtu Jisu Kristo gv aya lokv.

2

Alvmanv Angv

¹ Ngonugv Ahtu Jisu Kristo gv aakur kuse gv lvkwnv nga okv ngonugv ninyia lvkobv doopam pamse nga minrinyi: ngoogv ajin vdwa ngo nonua koodwkrwkla mindunv, ² nonugv mvngnamlo mvngpumvngpa bv mvngbwkgolo manv gubv riyoka vmalo Ahtu gv Alu hv looro pvku vla mvngru mabvka. So si mvngka kunamv vbvka ripvnpv nyikrw kaarilo vmalo japkar rilo minpvnpv vmalo ngonu siti loka lvkpvnv vla kvvbi gunv minpvnpv. ³ Nonuno yvnyika kupku yoka. Vdwlo ataranyabv Nyiru rumisinamv rilin maredw okv Alvmanv Angv uyumooku bolo dooji kunv angv daklwk maredw ho Alu hv loomare.

* **1:12** ngonugv Pwnvyarnv okv Ahtu gv; Vmalongonugv Pwnvyarnv okv Ahtu **2:1** 1Tes 4:15-17

⁴ Hv pwknvyarnv gubv rinv mvnwnngnga vmalo kumnarnonam dvdv nga rikin reku okv atu hv ho mvnwnngnga kaiyanv gubv minsureku. Hv Pwknvyarnv gv Pwknvyarnvnaam lo vnglwkla okv doolwkdula okv Pwknvyarnv gubv minsure.

⁵ Nonuno mvngpa malare? Ngo nonua lvkobv doorilo so mvnwnng sum nonua minpa jipv kunv.

⁶ Rigvrila vjak sum rilin moma dubv rinv vkv doodu, okv si ogu vdw um nonuno chindu. Vbvrikunamv ridw lo Alvmanv Angv daklwk reku.

⁷ Chinyumanam Alvmanv gv jwkrw hv kudungkua nga rirapla ridungduku. Vbvritola ogugo ritv dukudw hv rikumare, okv um lamtv loka naalinla naa ma dvdvlobv.

⁸ Vbvrikunamv Alvmanv Angv daklwk reku, vbvritola vdwlo Ahtu Jisu aari kudw ninyigv gaam gv saknam lokv ninyia sakki reku okv ninyigv loung unglit lokv ninyia ungyak reku.

⁹ Alvmanv Angv Uyu gv jwkrw nga lvkobv aagvlai kula mvvnamrunam bv nvgwngnv lamrwpanam okv kaasartabobv rila kaatam reku,

¹⁰ okv ngeji kunv nyi vdwa nvgwngnv kupnv nvnv rinvla kupre. Bunu nyereku ogulvgavbolo bunu Ringjikunv jvjv nga albv torwk sima.

¹¹ Vkvlgabv Pwknvyarnv bunu gvlo mvvnam gv jwkrw nga jilula bunua mvvnam ha mvngjwng motoku.

¹² Vbvrinam gv anyung ngv mvnwnngnv yvbunudw jvjv nga mvngjwng manv, vbvritola rimurlo himpu pumin karnv vdwa ngoomu dukubv ritoku.

¹³ Ahtu gv paknam ajin vdwa, ngonu nonugv lvgabv Pwknvyarnvnyi alu gv dwkia umbonyikv

vrung sego ogulvgavbolo nonugv jvjv nga mvngjwng lokv Pwknvyarnv nonua Dow gv jwkrw lokv ninyigv darwknv nyi bv mvnam lvgabv ringlin kunamlo nonua *darcho linpv kunv. ¹⁴ Ngonugv nonua Alvnv Yuninging jappi kolokv Pwknvyarnv nonua gokpv kunv; Pwknvyarnv nonua goknam mv Ahtu Jisu Kristo gv yunglinamlo nonugv baag ka paamu dubv vla goktoku. ¹⁵ Vkvlgabv ngonugv ajin vdwa nonuno ngonugv jappila okv siti bv lvkla rinam ho gv jvjv lo bikubiv mabv gakbwngla doonya laka.

¹⁶ Ngonugv Ahtu Jisu Kristo atubongv okv ngonugv Pwknvyarnv Abu, ngonua paknv okv ninyigv ayalo ngonua mvngrw ha jibwngnv okv biv manv mvngtin ha jin, ¹⁷ nonua mintvmirula alu gv dwkia alvnv ogu vdw um mindu ridubv gwlvk a jilaka.

3

Ngonugv lvgabv Kumlaka

¹ Ataranyabv, ngonugv ajin vdwa, ngonugv lvgabv kumlaka, Ahtu gv doinv nonugv hoka rinam apiabv baapubv dusik kardubv okv nyi vdwv doinv ha mvngdvla naarwksinam lvgabv. ² Okv ngonua Pwknvyarnv alvmanv nyi loka ringya dubv kumji talaka; ogulvgavbolo doinv ha tvvnv nyi dvdv ngv mvngjwng dunv vnam kaama.

³ Vbvrিতola Ahtu mvngtin dubv rin v ngv, okv nw nonua Alvmanv Angv loka ringyare okv mvngrw dubv mvre. ⁴ Okv Ahtu ngonua jidu nonua

* **2:13** atukchongv aingbv; Megonv kitaplo doodu atuake gv lokv

mvngtin dubv, okv ngonu nonua ogugo mindudw um nonu ridungdo okv ribwngre vla ngonu nonua mvngtin dunv.

⁵ Ahtu nonua rigvdakgyla Pwknvyarnv gv paknam ha okv Kristo gv saktv jinam ha kaiyayabv chindubv jigv nyika.

Kudungkua Rirung svngv

⁶ Ngonugv ajin vdwa, ngonu nonua Ahtu Jisu Kristo gv amin lokv mindunv nonuno vkvnv ajin vdwa adu silaka yvvbunudw sepelakrela okv ngonugv minam ha tvvla rimanv vdwa.

⁷ Nonuno atubongv alvbv chinsudo ngonu ogugo ripvdw um nonu riming gvvrung svngv. Ngonu nonua lvkobv rirelo ngonu sepelakre matoku.

⁸ Ngonu arv jimabv yvv gvka ridur ha anyubv naarwk simato. Vmabvya ngonu atubongv raaibv kudungkua nga gvlwkbv rise nga risuto; ogulvgavbolo ngonu nonua yvvnyika ngonugv lv-gabv dormu nwnigma mvngla kudungkua nga aluayu bv risuto.

⁹ Ngonugv vbvrinamv ngonu nonua ridur go koonyu rinyu manamgo doola ripvnnv vnam kaama; ngonugv vbvrinamv nonua kaagvla riming gvmu dubv vla ripvnnv. ¹⁰ Ngonugv nonua lvkobv doorilo, ngonu nonua vbv minkito, “Yvvdw kudungkua riji makv vdunv um dvnam dvmu yoka.”

¹¹ Ngonu vbv minto ogulvgavbolo nonugv ara lo nyi mego sepelakrela oguguka rimabv dominla kvvbinyi vdwgv korvpachu riku lo mingominpin riala ridu vla ngonu tvvpado. ¹² Ahtu Jisu Kristo gv amin lokv ngonu so nyi vdwa dinda bv singla

atubogv singdung lvgabv pwla paala relaka vla mindunv.

¹³ Vbvrítola ajin vdwa nonuno alvuv kudungkua rikulo agarapi rungyoka. ¹⁴ Ngonugv nonua siti jinam so gv doin a akonv tvvmabv rinu ngv doi nvpv. Vbvrinu go doholo, ninyia oguguka ribamdakbam yoka kaagapla kaapv laka, vkvlgavbolo ninyia hinying modubv. ¹⁵ Vbvrítola ninyia nyirunv aingbv riyo miyoka; vmabvya ajinamin bv gamrw yalaka.

Minyabv minam gamchar vdvw

¹⁶ Ahtu atubongv, ngonugv sarsopoyo gv lvtwngbv rinu, dw mvnwinglo okv lamtv mvnwinglo nonua sarsopoyo nga jigv nyika. Ahtu nonu mvnwingnga lvkobv dooming gvlaka.

¹⁷ Ngo atubogv laak lo sum lvkdunv: Paul lokv kumrwknama jidunv, svbv ngo lvknam ha ngo svbv dvdv bv lvkdunv.

¹⁸ Ahtu Jisu Kristo gv aya ngv nonu mvnwinglo dooming gvlaka.

ANWNV GAMLV
Tagin first Bible translation based on TEV (Good News)
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin
Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 13 Jul 2024 from source files dated 15 Apr 2023

65e96bca-33d6-5dc6-a8ee-da485ecfb7ed